

連翹湯無鷄舌香，却有丁香，此最爲明驗。新補本草又出一條，蓋不曾深考也。今世所用鷄舌香，乳香中得之，大如山茱萸，剝開中如柿核，略無氣味，以治疾殊極乖謬。疑源君之時，俗以所謂乳香中所得丁香母爲鷄舌香，故分以爲二，然合以香口之鷄舌，卽丁香，非丁香母也。蘇敬曰：鷄舌香，樹葉及皮並似栗，花如梅花，子似棗核，此雌樹也，不入香用。雄樹著花不實，採花釀之以成香，出崑崙及交廣以南。本草圖經云：其言有採花釀成香者，今不復見。果有此香，海商亦當見之，不應都絕。京下老醫或有謂鷄舌香與丁香同種，花實叢生，其中心最大者爲鷄舌香，擊破有解理如鷄舌，此乃母丁香，療口臭最良，治氣亦效。蓋出陳氏拾遺，亦未知的否。李時珍曰：雄爲丁香，雌爲鷄舌，乳香中所揀者，乃番棗核也，卽無漏子之核，前人不知，丁子卽鷄舌，誤以此物充之爾。

〔倭名類聚抄十二〕雀頭香 江表傳云：魏文帝遣使於吳，求雀頭香、龍腦香。蘇敬本草注云：龍腦香者，樹根中乾脂也。

〔箋注倭名類聚抄六〕香具 本草云：龍腦香出婆律國，形似白松脂，作杉木氣。蘇敬曰：樹形似杉木，子似豆蔻皮，有錯甲，香似龍腦。舊云出婆律國，藥以國爲名，卽杉脂也。江南有杉木，未經試，或方土無脂，猶甘蔗無實。嘉祐本草引西陽雜俎云：龍腦香，樹出婆利國，呼爲箇不婆律，亦出波斯國，樹高八丈，大可六七圍，葉圓而背白，無花實，其樹有肥有瘦，瘦者出龍腦香，肥者出婆律膏。香在木心中，波斯斷其樹，剪取之，其膏於樹端流出，斫樹作坎而承之。本草衍義云：西方抹羅短吒國在南印度境，有羯布羅香，幹如松株，葉異，濕時無香，採乾之後，折之中有香，狀類雲母，色如冰雪，此龍腦香也。蓋西方亦有李時珍引葉廷珪香錄云：乃深山窮谷中，千年老杉樹，其枝幹不會損動者，則有香，若損動則氣洩無腦矣。土人解作板，板縫有腦出，乃劈取之，大者成片如花瓣，清者名腦油。李時珍曰：龍腦者因其狀加貴重之稱也。

〔倭名類聚抄十二〕青木香 南州異物志云：青木俗云象目出天竺，是草根狀似甘草。